

GST bantu kemakmuran bersama

Umum sedia maklum bahawa cukai barang dan perkhidmatan (GST) diamalkan lebih 160 negara. Ia sistem percukaian diamalkan oleh majoriti negara di seluruh dunia yang berasaskan cukai penggunaan.

Penulis berpendapat penjenamaan semula GST kepada satu bentuk sistem percukaian yang lebih telus dan cekap dengan menggunakan platform sedia ada, mampu meningkatkan hasil kerajaan, sekali gus menyokong Wawasan Kemakmuran Bersama yang ingin dicapai menjelang 2030.

Berdasarkan pelaksanaan GST sebelum ini, kerajaan mengutip hasil RM41.2 bilion pada 2016 dan meningkat kepada RM44.3 bilion pada 2017. Namun, selepas pengenalan semula cukai jualan dan perkhidmatan (SST) pada 1 September 2018, hasil cukai dianggar menyusut se-

kitar RM22 bilion.

Penurunan hasil cukai memberikan tekanan kepada kerajaan dalam melaksanakan pelbagai program pembangunan negara dan memakmurkan ekonomi rakyat.

Secara prinsip, sistem GST memberi kelebihan kepada banyak pihak. Contohnya, pengeluar boleh menerima rebat GST ke atas input yang mereka gunakan dan sekali gus membolehkan pengeluar mengeluarkan barang pada harga lebih kompetitif terutama kepada pengeluar barang eksport.

Menerusi sistem GST, kerajaan boleh menjadikannya sumber maklumat untuk memantau rantai bekalan untuk tujuan pelaksanaan dasar yang lebih komprehensif, bagi membantu pengeluar meningkatkan daya saing mereka.

Akhir sekali, peningkatan hasil kerajaan mampu memberikan ruang lebih besar kepada kerajaan untuk melaksanakan program kebajikan, bagi membantu meringankan beban rakyat.

Antara cadangan yang boleh dipertimbangkan dalam penjenamaan semula GST adalah:

Pertama, mengenakan kadar cukai serendah 3 peratus ke atas semua barang kecuali barang asas seperti makanan dan minuman terpilih, perkhidmatan kesihatan asas dan perumahan.

Kedua, memastikan proses pengembalian rebat cukai dilakukan dengan telus dan cekap, supaya membolehkan pengeluar menggunakan rebat untuk tujuan modal pusingan perniagaan mereka dengan lebih cepat.

Ketiga, memastikan kaedah pelaksanaan kutipan GST difahami semua lapisan rakyat melalui

kaedah pendidikan dan kesedaran bersesuaian, supaya maklumat berkaitan cukai itu tidak di-salah faham.

Keempat, mengambil tindakan tegas kepada pengeluar yang ambil kesempatan mengenakan caj tambahan kepada pengguna.

Penggunaan platform GST se-dia ada tidak akan membebankan pihak pengeluar untuk mengembalikan operasi sistem cukai ini.

Malah, penulis menjangkakan kerajaan juga tidak perlu mengeluarkan perbelanjaan besar untuk mengembalikan sistem cukai ini.

Dr Muhammad Daaniyall Abd Rahman,
Pensyarah Kanan
Fakulti Ekonomi dan Pengurusan
Universiti Putra Malaysia (UPM).